



heis(s) verdient

Text: Hans Jürg Zingg / Melodie: Hans Jürg Zingg
Begleitimprovisation: Edwin Peter

mir sy ds rychschte vouk vor wäut u heis verdient
heis verdient heis verdient
mir sy ds rychschte vouk vor wäut u heis verdient
heis verdient heis verdient heimatland

chrampfe macht rych
drum hei mirs verdient
rychsy isch e chrampf
o das hei mir verdient
spare macht rych
weis jede ryche ma
rychsy macht sparsam
der arm dä merchts is a

mir heis erspart erchrampfet erdientet
üses bruttosoziauprodukt
hei geüböglet gschliimet hei tschaupet is truckt
hei arschgläcket bschisse hei gloge wi truckt
drum hei mirs gopfridschtutz würtlech verdientet
dass me di leischtig i d zytige druckt

üsy outobahne mir hei se verdientet
üsy bankpaläscht üsy strafanstaute
üsy uferkultur üsy eierfabrigge
mir hei se verdientet mir wei se bhaute

mir hei se verdienet üsy nöirose
üsy psychiatrie üsy villen am see
üse stress üse chräbs üsy roucherthrombose
verdienet gwüss ou üsy ahakawee

mir hei ne verdienet der friden am abe
mattschybenerlüüchtet im pouschtersitz
üse fruscht üse suff üsy drogetote
üse schwyzer humor üse unstätblech witz

mir hei se verdienet di fröid am läbe
wo me üs jede tag a de gsichter agseht
üsy pornoparadies üsy yneschoppiländer
u d rue i de chinderfründleche stedt

mir sy ds rychschte vouk vor wäut u heis verdienet
heis verdienet heis verdienet
mir sy ds rychschte vouk vor wäut u heis verdienet
heis verdienet heis verdienet heimatland

mir heis doch gwüss schön
oder nid
mir makes doch rächt
oder nid
mir wei zfride sy
oder nid
es louft doch nid schlächt
oder nid
mir hei no kredit
ja mir hei u gäbe kredit
wäm mer wei

denn
mir sy ds rychschte vouk vor wäut u heis verdienet
heis verdienet juhee
mir sy ds rychschte vouk vor wäut u heis verdienet
was weeeeei mir noo mee